

EPESUS DILAG NAI PAULUS YOM

KAYAKNU OOPA GENAB DOYAK DIIG

¹ Da Paulus, da Kristus Jesusnu totol danab daakulnu Kayak Nug da tituanidom amu da Epesus danab ah ag Kayaknu oolagpa genab doona, Jesus Kristus ele ou qak daateb, ahilagnu iiku yaatem.

² Am ig oh Mamenig Kayak amu Nadi Jesus Kristus ele, ahilah ehanitak okai hamu megtep amu ahilah madod ele ahilagpa daaglahnu ool daate.

³ Kayak Nug Kristusnu udat okai, diig amunu Nug ig nuhikud danabnab daagnignu hab atannu ititak oh mekom amunu ig Nug, Nug am ihinig Nadi Jesus Kristus Mameg amu, Nug binag metu!

⁴ Kayak Nug wan ii beum haenpa Nug ig Kristusnu udat okaipa, ig Nug noobpa ehed laa iita, opia awak daagnignu, ig Kayaknu amu ig lain-tad dilagnu ele nug oo mauhak doognignu tutu-anikom.

⁵ Nug anuka dab meum, oo ele niiom bia amu Nug Jesus Kristusnu udatpa ig Nug bekod daagnignu meikom daatem.

⁶ Nug anam heum, diig amunu nuhig ehanitak okai hamu megte, amuam ehanitak enanagnab amu binag aote. Nug Kristus, Nug nuhignu oo huana mauhte ele amu, Nug nuhig udat okai ihinignu heum ele amu dab maama, ehanitak okai amu ig mekom.

7-8 Kayak Nug doyak okainab nuhig amupa Nug dab meka, Nug ehanitak okai nadinab hamu megaka, Nug Jesus Kristus tiigpa Nug ihinig hipunin uhuqa mekowa amu Nug edua awikom.

9 Anuka Kayak Nug nuka nuhig dab makpa Kristusnu udatpa ehanigkunu dab meum amu Nug dab mak amuib dim lamita he, ihinigpa miag atiom.

10 Nug oo niite am inam. Nug ulum adebeb, Nug haen epediom ele amu udieb, keeke hab atannu, wanpanu ele amu Nug oh qag maateb, Kristus waapaib daapeg, Kristus Nug keeke amu oh ikilag daaku.

11 Ig nuhig udat okaipa Kayak bekod daatem. Kayak Nug keeke oh atem bekunu dab mete amu anamib bete amunu Nug ig nuhikudnab daagnignu dab maama meikom daatta, ig Nug bekod daatem.

12 Nug ig nuhignu anuqta, oonigpa genab doot, Nug dim lamidtem amu ig Kayak, Nug binag okai mekunignu amu, ig nuhikud daagnignu tituanikom.

13 Ag Epesus daateb amu, ag ele Kayak Nai Ena, amuam Kayak Nug ag edua diikunu ib babaitom, nai amu doonna, ag Kristusnu oolagpa genab doopig amunu Kayak Nug nuhig Oudi, anuka Nug megakunu nai qaka aum amu, ag genab nuhikudnab daateb dooglagnu amu Nug nuhig Oudi ag matom.

14 Kayak Nug ig dimpa gog tak haenpa ig keeke oh Nug megakunu aum amu ig megakunu genabnab doognignu amu Nug nuhig Oudi, hapin paniak bia, ig mekom. Ig Kayak binag metu!

BINAG ENA MAK UNUQITAK ELE

15 Kayak Nug anam tituanik_{om} amunu da ag Nadi Jesus Kristusnu oolagpa genab doopig, nai amunu amu ag Kayaknu danab ah oh dilagnu oolag mauhte amunu ele doyen,

16 da ahilagnu hanhan Kayak amegpa, “Ena heme,” awe atem. Da unuqiti_{ti}, ag haen oh da daulpa doegeg, da

17 ihinig Nadi Jesusnu Kayak, Nug am ig Mamenig, binag okai ele, Nug ag Oudi mateb, nuhig nainu diig, Kayak ele tutuku dooglagnu ool dayeye unuqidtem.

18 Da Nug heeb, ahilag dab mak amahleb, buti adi ag adi keekenu Nug ag onilagpa eum ele amu, ag amunu dab mak gagatag aona, ag oolag gamag ahebeb, ititak oh Nug nuhikud danab ah oh aoglagnu nai qaka tituanom ele amu, ag amu oh dooglagnu ele unuqidtem.

19 Amu ele, da ag nuhig gagatag okainab, batak iita ele, gagatag amu ig oopa genab doyak ele ihinigpa niite, gagatag amu ihinigpa udat hete ele amu, ag gagatag amu ele dooglagnu unuqidtem. Gagatag amuam Kayak Nug nuhig gagatagpa he, Jesus edua hibaitom, amu aakuib.

20 Gagatag amupa Kayak Nug he, Jesus Nug edua hibaita, Nug hab atan Kayak epeg nadiappa, amuam anuqak aben, amupa daate.

21 Nug wan imupa iki danab, danab okai, danab nakok okai amu danab nug onig ele oh edadte. Genab. Nug binag amu laa oh binalag edidte, gemu daateb am buti adi ele daaglag amu oh edidte.

22 Kayak Nug he, keeke oh Jesus waapa daate amu Jesus Nug kristen tamaniak ag ehanadkunu

ahilag iki daate.

²³ Tamaniak nug am Jesus bedu bia. Jesus Nug am iki daate. Tamaniak am Nug bedu laa oh, epeg, baeg, amubia. Nug aben ohpa keeke ohpa am bak daate.

2

KRISTEN AG KRISTUSNU UDAT OKAI PA BAU DAATEB

¹ Ag anuka oitapig amu haen amupa ag Kayak ele oolag laipu ii oipig. Adinu? Ag hipunin diigdiig henan, oolag mauhak bia dayeye oitapig.

² Haen amupa ag wan imupan kobol nau amu ag Satan, nug am oudi nau ikilag, nug ele dim lamidpig. Gemu ele danab ag Kayak ode ii dim lamidteb amu ag Satan waapa daateb.

³ Ig oh anamib anuka daamut amu haen amupa ig dab mak geha iikunu aakuib dim lamidmut. Ig bedunig amu ihinig dab mak ena iita ele, a adi apid amu ig hetamut amunu ig danab laa oh ele amupa hipuninnu bu aqak, Kayak epegpanu udite ele amu, ig amu aognignu elele daatamut.

⁴ Amge Kayak, Nug am ihinignu oo mauhak okai ele, Nug ihinignu oo gai iita doote ele amu,

⁵ haen ig hipunin heta, mauhak bia daatta, Kayak ii dim lamidtamut ele, haen amupa Kayak Nug ig Jesusnu udatpa bau mekom. Kayaknu ehanitak okai hamu megte amupa aakuib Nug ig edua awikom.

⁶ Kayak Nug edua mad edike, ig Kristusnu gagatagpa hipuninnu gagatag edidmut daatem amu, ig Kristus Jesus ele hab atan daagnignu oninig mekom.

⁷ Nug anam heumnu diig am Nug nuhig ehanitak okai hamu megte, laa oh edatak, Nug amu dab maama, Kristusnu udat okai, diig amunu Nug ihinignu kobol enanag hete amu danab oh buti adi daaglag amu Nug ag amu ipuanadkunu heum.

⁸ Ag Kayaknu oolagpa genab doopig amu amupa Kayak Nug ehanitak okai hamu mata, Nug ag edua diia, bauklel matom. Nug ahilag udat, amunu dab maama ii matom. Iita, Nug ag hamu matom.

⁹ Nug danab laa nug nuka nug onig humamanu, ahilag udat hakpa ii matom. Iita.

¹⁰ Amu Kayak Nug nuhig doyakpa Kristus Jesusnu udat okaipa bau menuak meke, ig kobol ena hekunignu daatem amunu ig, ig oninig humagnignu elele iita. Ao, Kayak Nug ig amupa oignignu anuka babaita mekom.

KRISTUS NUG IG OU IQE, LAIPU DAA_{TEM}

¹¹ Aria ag iita adi, anuka Juda, ag aka epelagpa gadalag otadteb ele amu, ag ahilagnu amu, “Ag gadalag ii otadteb ele,” aon adapig amu, ag iita adi ag anuka atem daadtapig amu daulagpa doad!

¹² Haen amupa amu ag umanab Kristus iitapa daadtapig, ag Israel baekudpa ele ii daadtapig. Kayak Nug Israel ag ele nug tituanna, nai qakan, ag nuhikud daapig amge ag iita adi ag amu oopa ii daadtapig. Ag wan imupa daapig amu ag keeke laa dimpa bekunu ameg mak ele ii daapig. Iita, ag hamu daapig. Ag Kayak ele ii doopig, umanab daapig.

¹³ Amge gemu amu Nug Kristus Jesusnu udat okaipa, ag umanab daapig amu, Nug ag omalate, Nug tiigpa Nug gumidna udipig.

JESUS NUG IITA ADI DANAB JUDA ELE OU AQOM

¹⁴ Ao, Kristus Nugib am ihinig madod danab. Anuka Juda amu ag gadalag ii otadak ele, ag ele keked daadtapig. Kobol amu nug ou qa laipu oiyaknu ib oo ne, ag ameg adit daadtapig amge Kristus Nug bedupa ib oo nak amu lopada, ameg adit amu ou aqatom.

¹⁵ Nug ameg adit amu ou aqateb, ameg adit dilah danab ag danab bau bena, ameg laipu daaglagnu, Nug nuhig mauhakpa Nug do nai, amupa do digdiig dim lamidkunignu yak dayom amu, Nug amu hokalom. Kobol amupa nug he, ig oh madod daatem.

¹⁶ Nug ad emaitakpa mauhom, amupa ameg adit amu ou aqate, a laipu daatep. Ad emaitak amupaib Nug keked kobol qe, iita me, Nug danab amu oh omalata, Kayak topa ukom.

¹⁷ Nug aakuib udia, ameg laa uma daapig ele amu, ameg laa miag daapig ele amu, Nug ag oh ag oolag laipu madodpa daaglagnu aum.

¹⁸ Amunu ig ameg adit amu, ig oh Kristusnu udat okaipa, Kayak Oudi laipunu ehanitakpa, ig oh Mame topa gokunignu elele.

¹⁹ Anam daate amunu ag iita adi ag baula ab laapanu udiak danab bia iita. Ag Kayaknu danab ele ameg laipu, ag ele Kayak bekod.

²⁰ Ele amu ag am Kayak laug bia daateb. Ig nuhig total danab amu nuhikud propet ele amu

ig lag amunu mawa daakunu keeke meut, ag amu qadeba daateb. Kristus Jesus Nug am laug amunu men anuqak daate.

²¹ Nugib he, danab ag lag ebehi oh tutuku tuditeb amubia kristen danab oh ag laipu qag mena, Nadi noobpa opia awak daanna, nuhig udat hekulagnu, Kayak laug bia beegeg, okai mete.

²² Kristusnu udat okaipaib ameg adit amu ag ou aqe, laipu bena, ag Kayak Oudipa, Kayak Nug daakunu laug aaku beteb.

3

PAULUS NUG KRISTUSNU MEHUQOM

¹ Diig amunu amu da Paulus, da iita adi ag ehanadkulnu Kristus Jesusnu mani guitak danab daatem.

² Ag dooteb. Kayak Nug da ehanitak okai hamu meda he, da iita adi ag amelagpa Kayak Nug ag ehanadkunu hete amu mehuqkulnu daatem.

³ Kayak Nug anam hekunu dayom, dab mak amuam anuka lokumak dayom am Kayak Nug dahilpa mehug doomi. Da amunu amu da nai tutu laa yen malami.

⁴ Ag nai imu eb qekulag amu ag da Kristusnu dab mak lokumak dayom, amunu dab mak aotem ele amu, ag amu oh doona, oolag maidku.

⁵ Anuka haen oh Kayak Nug nai lokumak amu miag ii atiom amge nuhig Oudipa Kayak Nug Jesusnu total danab amu propet nuhig elepa he, nai amu miag atiom.

⁶ Nai lokumak dayom amu inam. Gemu Nai Ena gagatagpa ameg laa, amuam iita adi, ag Juda ele

laipu ou qak daateb. Ag anam daanna, ag ele keeke oh Kayak Nug Juda aoglagnu nai qaka aum ele amu, Kristus Jesus onigpa aoteb.

⁷ Kayak Nug da Nai Ena imu mehuqkulnu nuhig udat danab meida, Nug da ehanitak okai hamu medowa, nuhig gagatag ele medom.

⁸ Da am Kayaknu danab laa oh noolagpa keeke hamunab daatem amge Kayak Nug ehanitak okai hamu meda, Nug da iita adi noolagpa Kristusnu keeke ena ohnu, danab nug amu anidkunu elele iita, nai amu mehuqkulnu meidom.

⁹ Ao Kayak Nug keeke oh hatom ele amu Nug nuhig dab mak, iita adi dilagnu, amu lokume dayom. Dab mak amu nug lokumak haen oh daatom amge gemu Nug da nuhig dab mak amu miag mehuqkulnu udat amupa meidom.

¹⁰ Kayak Nug dab mak inam awom. Gemu kristen tamaniak oopan danab ah amu ag nuhig hak ena ena am miag atipeg, hab atannu daup iki amu anuqak danab ele ag ohnab dooglag.

¹¹ Kayak Nug anuka ihinig Nadi Jesus Kristus, nuhig udat okaipa anam hekunu aum amu Nug aaku heum.

¹² Jesus Kristusnu udat okai, diig amunu amu nuhignu oopa genab doyak, amupa ele, ig Nug ele ou geta daatem amunu ig Kayak topa gokunignu ib matulak daate. Ig gokunignu ii badatem.

¹³ Amunu amu da iiku ag amelagpa atem. Da ug maotem imu amu da ag ehanadkulnu maotem amunu ag ug imu dab menana, ag bodo aib edapig. Ag anam hekulag amu ag ele onilag okai aoglag.

PAULUS TAMANIAK BAU DILAG UNUQIDTE

¹⁴ Da Kayaknu dab mak amu dab mein, da amunu Mame noobpa gatel qaun otem.

¹⁵ Kayak Nug Kristus nuhigpaib he, danab ah hab atannu wanpanu ele, ag Jesusnu oolagpa genab dooteb ele amu, ag oh ag onilag aoteb.

¹⁶ Da gatel qaun oin unuqidtem amu da Kayak Nug nuhig Oudipa ag ehanata, Nug nuhig ehanitak diigdiig hab atannu ag oolag amupa gagatag aqakunu

¹⁷ amu ahilag oopa genab doyakpa Kristus Nug ag oolagpa dayeb, Kayaknu oo mauhak ag gagatag aqeb, ad didi nug wan ade, ad gagatag daate, amubia ag gagatag daaglagnu unuqidtem.

¹⁸ Laa ele amu ag anam daapeg, Kayak Nug gagatag mateb, ag Kayaknu danab laa oh ele, ag oh ag Kristusnu oo mauhak, amuam nadinab genab ele, ag amu genab dooglagnu unuqidtem.

¹⁹ Ao, ig Kristusnu oo mauhak diig oh doognignu elele iita amge ag keeke ena, Kayak Nug nuhigpa am bak daate amu, ahilagpa ele am bekunu, ag nuhig oo mauhaknu huan dooglagnu unuqidtem.

²⁰ Aria ig Kayak, Nug nuhig gagatag ig oonigpa udat hete ele amu, Nug amupa keeke okai okai, ig Nug megakunu dab metem o iita Nug od medatem ele amu, Nug amu editak okainab megakunu elele amu,

²¹ ig kristen tamaniakpa daatem, ig Jesus Kristus onigpa Nug binag metu! Ig gemu amu dimpa ele anamib hetata daatu! Ig hanhan anamib hetu!

KRISTUS BEDU AMU KRISTEN DANAB AH

¹ Ao, da Naḍinu uḍat heṭem amunu mani guitaḵpa daaṭem ele amu da Kayak, Nug ag onilagpa eum, amunu dab mein, da ag ahan, ewak baag amu dim lamidna tutuḵu elelepa oiglagnu iiku unuḡaḍṭem.

² Ag hanhan ag aḵa aḵa ag am danab binag iita ele bia dab menana, oolag bodo eṭak ele daanna, opoḍi bak paha aib doopig. Ag oo mauhak kobol dim lamidna, ag nug ehanidnana dayeg!

³ Maḡoḍ kobol ag tamaniadṭe, amupa Kayak Oudi Nug he, ag laipu daaṭeb, amubia ag tuḍidna daaglagnu wagai meig!

⁴ Ao, ig oh Kristus beḍu laipu daaṭem, Oudi ele am laipuib. Oudi laipuib daaṭe, amuam Kayak Nug ag keeke laipu, amuam bauklel, ag amu aoglagnu dab mak gagatag aḍan ameg meḵulagnu onilagpa eum, amuam laipuib amubia Oudi Nug laipuib daaṭe.

⁵ Aria Naḍi Nug laipu, oonigpa genab doyak am laipu amu layataḵ ele laipu.

⁶ Kayak ele laipu, ig oh Mamenig. Nug danab oh dilag Oḵai daaṭe, Nug danab ohpa nuhig uḍat heṭe amu Nug danab oh oolagpa daaṭe.

⁷ Ig oh laipu daaṭem amge ig anen anen, uḍat iḍu iḍu tamaniak oopa heḵunignu, Kristus dab meum bia, ehah diigdiig aomut.

⁸ Amunu Kayak naipa nai inam daaṭe. “Nug ameg kuḍumnab mani guitaḵpanu diia, aṭan teum. Diia aṭan ta, Nug danab ḍo maṭom.”

⁹ Amge, “Nug aṭan teum,” amu diig aṭemun? Nug wan oopa iite noum? Yo, Nug tatam wan oopa noum.

¹⁰ Nug tatam wan oopa nowowa, edua atan ele teum. Nug hab atannu edata atannab teum. Amupa keeke oh nuhigpa am bak daate,

¹¹ Nugib ehah idu idu mata, danab laa ag totol udat hek_ulag_unu ma_utom. Laa ag propet daaglag_unu ma_utom. Laa ag nai mehuqak danab daaglag_unu ma_utom. Laa ag pasto am laa ag ipuanitak udat hek_ulag_unu ma_utom.

¹² Kristus Nug bedu laipu nadi daak_unu amu Nug Kayaknu danab ag udat ena hek_ulag_unu, udat anen anen danab amu anam ma_utom.

¹³ Udat amu u_ukeb u_ukeb, ig oh oonigpa genab doyaknu, ig oonig laipu meta, Kayak Bek_uanu doyak laipu aota, danab kalunig ele beta, ig Kristus bia bekunig.

¹⁴ Amu nai itag, ham bupuak danab dilag, amu ele heeb, ig ub nug ulah kadag haenpa duban he, u_uka qa, u_ud_uia qa hete amubia ii hemata. Nid nakok ag amubia hete_ub amu ig baula, ag bia ii daamta.

¹⁵ Iita, ig oo mauhak dootta, ig nai genab miag madiput, ihinig dab mak okai meeb, ig keeke ohpa ihinig iki Kristus, Nug oite amubia ig oignig.

¹⁶ Danab bedunu laih kud_um oh ag didipa tud_uitak daanna, ahilag udat anen anen pehetak heegeg, bedu ena mete amubia ig tamaniak oopa daatem ele amu, ig ihinig iki Kristus nuhigpa laipu daat, ig udat ihinig anen anen hetata, ig nug oo mauhakpa oitut, tamaniak ena mete.

AMAH_uLAKPA OIYAKNU NAI

¹⁷ Amunu da imu ag amelagpa a_utem. Da Nadi onigpa iiku gagatag maditem. Ag nai imu aoteb ele

amu, ag iita adi ag dab mak apididna oiteb ele amu, ag kobol amubiapa baula aib oipig.

¹⁸ Iita adi amu ag am dab mak iita, ahilag dab makpa am gatatuib. Ag dab mak iita, ag Kayak di metanna, Nug dim lamidkulagnu oolag ii daate amunu ag Kayaknu bau ena iinab aopig.

¹⁹ Ag oolag gagatag ele, ag oo doyak iita, ag hipunin adi heteb am ag uda nak ii doonna, ag badak ele iita amunu ag kobol nau, kobol ehed ele, keeke adi adi diigdiig hekulagnu oolag huana dayeye henana, ag tudidna naunab ele hekulagnu dab meteb.

²⁰ Amge ag Kristusnu nai doopig ele amu, ag amupa kobol nau oh amubia hekulagnu nai laa ii doopig.

²¹ Iita. Ag nai doopig ele amu ag Jesusnu aeg iite doopig? Ag kristen beeg, ag nuhig nai genab aeg iite doopig? Yo, ag anam doopig

²² amunu ag oolag alag, nug dab mak ehed awa, kobol nau diigdiig hekunu dab maama, mauhkunu hete ele amu nug he, ag matu nuhig dab mak dim lamidpig ele amu, ag oiyak amu ag uueg!

²³ Kayak Nug heeb, ag dab mak bau aweg!

²⁴ Laa amu ag oolag bau, Kayak Nug, Nug bia, tutukunab opia awak ele daakunu babaitom amu ag amu aon danab bau oiyeg!

²⁵ Ag kobol ham bupyak amu uueg! Ag nai genabib laa amelagpa matieg! Ag dooteb, ig am bedu laipunu laih kudum daatem.

²⁶ Ag opodilag beeb amu ag hipunin hemananu dab meig! Ag opodilag beeb amu opodi bak amu nug dayebab ukeb, aam aib noum. Aam ii noak haenpa ag oolag laipu meig!

27 Ag Satan aib ib odna medapig.

28 Yabhok danab nug baula yabhok hekunu aib heum. Iita, nug udat had! Nug epegpa udat ha, keeke ele daya, danab aun laa ag keekenu dadək ele amu matad!

29 Nai udig wak laa ag odelagpa aib beum. Iita, nai ena danab gagatag madate, danab ehanadte, nai amuib ag odelagpa bad! Amupa Kayaknu danab ag ahilag nai dooteb ele amu, ehanitak mataglagnu elele.

30 Ag Kayak Oudi oo ug aib medapig. Adinu? Ag Nug aopig oiteb amunu dimpa uhuqaknab awaknu dedpa Kayak Nug uhuqaknab madakunu, nuhig Oudi, eponak keeke bia, ahilagpa daate.

31 Ag oo nauhak kobol, opodi be amya oiyak kobol, mutub qak kobol, dimug nai matiak kobol amu kobol laa oh oo aeg baknu bia amu ag amu ele uueg!

32 Ag lailkad dilagpa kobol bodo etak henana, oolag oh ag mateg! Kayak Nug Kristus nuhigpa ahilag hipunin uhuqa matom amubia ag ele lailkad dilag hipunin uhuqna mateg!

5

1 Ag Kayak bekod daateb, ahilagnu Nug oo mauhte amunu Nug ipu hena dayeg!

2 Ag nug oo mauhakpa, Kristus Nug ihinignu oo mauhe, Nug nukā Nug bau dayak nuhig ig ehanigkunu uua, ihinignu mauhom bia oiyeg! Kristus Nug danab ag dod main Kayak mutudig ena dookunu medateb bia, nukā nuhigpa anam heum.

³ Amge gapai kobol oh o iita ameg qak kobol o iita oo aeg bak kobol, amuam ahilagpa nakoknab laa aib dayom. Adinu? Ag am Kayaknu danab opia awak ele amunu ag kobol amu hekulagnu am tutuku iita.

⁴ Ag nai opia awak iita, nai hamu meu iita, amu qid hak nai nau, meu iita ele amu, ag amu matiglagnu elele iita. Ag amu ele aib madipig. Ag amu uuna, Kayak amegpa, “Ena heme,” aakuib aig!

⁵ Adinu? Ag dooteb, gapai danab, danab nug oopa opia awak iita amu danab nug ameg qak nau hete ele, danab amu nug kayak ham bupyak dim lamidte, amu aria, danab amu nug Kayak Jesus ele dilah do madod oopa ii daama.

⁶ Laa nug nai hamu matiakpa ag eedateb, kobol nau oh amupa nomananu dab meig! Kobol amunu hipuninnu bu aqak, Kayak epegpanu udite amu, nug danab ag Kayaknu do tapaeg nete ele amu ahilagpa daate,

⁷ amunu amu ag danab amunu ele ou qena aib oipig.

⁸⁻¹⁰ Anuka ag gatatupa daadtapig amge Nadi Nug gemu ag amahlakpa maatom. Amahlaknu meu amu kobol ena, kobol opia awak, kobol genab ele amunu ag kobol Kayak oo itag qete ele amu doon aonna, ag amahlak danab oiteb amubia ag amahlakpa oiweg!

¹¹ Gatatu udat, meu iita ele, dimitim danab laa ag heteb ele amu, ag anam aib hepig. Iita, ag nuhig meu nau amu miag atipeg, danab ah oh anteg!

¹² Gatatu kobol laala, danab gatatupa oiteb ag

lokumna heteb amu, da amunu matilom amu da u^{da}l nelo.

¹³ Amge keeke oh amahlakpa daate ele amu, keeke amu ag miag atieg, danab ag anidteb.

¹⁴ Keeke miag atiak niite ele amu, amahlakpa daate amunu nai imu Kayak naipa niite. “Na niitem ele amu na ahe! Na mauhakpanu edun hipaidpe, Kristus na amahlak medaku.”

¹⁵⁻¹⁶ Amunu ag oiyak ahilag dab metan autna aona, danab oolagpa dab mak ele daanna oiye^g! Ag danab oolagpa, ag danab dab mak iita ele aib daapig, amubia aib oipig. Ag amu dab menana, gemu am haen nau amunu ag udat ena hekulag^{nu} laa dayeb anidna amu ag aib uupig. Ag haen agupanab heig!

¹⁷ Gemu am haen nau amunu ag kaaka aib aqom. Kayak Nug oo atemun niite amu dab menana, anamib oiye^g!

¹⁸ Danab nug le gagatag huana lawowa, kaaka qete amu nug kobol kudum dab mak iita ele hete amunu ag diig amunu le gagatag lana, kaaka aib aqom. Iita, ag amu uuna apeg, Kayak Oudi Nug ahilag oiyak oh gumad!

¹⁹ Ag qag mena, Sam amu Kayaknu ahi laala ele ahi etanna, Kayak humidnana, oolagpa Kayak binag meig!

²⁰ Ag haen oh Jesus onigpa keeke ohnu Kayak amegpa, “Na ena heme,” aon aig!

EWAU DAYAKNU KOBOL TUTUKU

²¹ Ag Kristusnu enanab doon, oolag otaieb, ag lailkad waalagpa dayeg!

22 Ah ag Kristus waapa daateb amubia ag gamulkad waalagpa dayeg!

23 Adinu? Kristus Nug nuhig tamaniaknu iki daate amubia danab nug ahnu iki daate. Tamaniak am Kristus bedu bia daate amu Kristus Nug tamaniaknu edua awikak danab daate.

24 Kristen tamaniak nug Kristus waapa daate amubia ah ag ele keeke ohnu gamulkad waalagpa dayeg!

25 Kristus Nug nuhig tamaniaknu oo mauhe, Nug nuka nuhig bau dayak amu uua mauhom amubia danab ag waalkad dilagnu oolag mauhad!

26 Kristus Nug tamaniak lepa amu Kayak naipa ele iheb, opia awak daakunu,

27 Nug kristen tamaniak Nug noobpa enanagnab, dubutid iita, gone ele iita, enanag opia awaknab, ehed laa iita ele, anam dayeb aoku amunu ele mauhom.

28 Amubiaib danab ag aka bedulagnu oolag mauhte amubia ag waalkad dilagnu oolag mauhad! Danab nug waunu oo mauhte amu nug nuka nuhignu oo mauhte.

29 Ig dootem, danab laipu laa nug nuka bedunu nug oopa nau, ninig ele ii doote. Iita, nug Kristus Nug nuhig tamaniaknu hete amubia nug epa begitata, atog ele note.

30 Adinu Kristus Nug tamaniak atog note? Tamaniak am Nug bedu bia daate amu ig tamaniak oopa daatem ele amu ig am bedu amu laih naunau kudum bia daatem.

31 Danab nug ahnu anam dooku amunu, “Danab nug mameg anig ele uuata uke, nug wau ele ou qeya bedulah laipu meya oitep.”

³² Nai amuam diig unuqagnab ele, am Kristusnu, nuhig tamaniaknu ele

³³ amge ag aka aka anen anen imu dooglagnu ele ipunigte. Na naka nahipnu oot mauhte, amubia na waatnu oot mauhad! Amu ah ele nug gamu onig humaku.

6

NID NAUNAU ANILKAD MAMELKAD ELE DILAG NAI

¹ Nid naunau, ag Nadinu nai dab menana, ag anilkad mamelkad odelag dim lamiteg! Kobol amuam tutuku.

² Kayak naipa amunu yak laa daate am inam. “Na anin mamen ele binalah mena, a odelah dim lamite!” Kayak Nug do laa oh ag tatam matom amu ag dim lamidna, keeke ena aoglagnu nai qaka ii aum. Iita. Do imupaib Kayak Nug diig ma anam heum.

³ Kayak nai gagatag qeta aum am inam. “Na do amu ate bia hekut amu na haen elab wanpa ena daakut.”

⁴ Am nid mamelkad ag bekalkad adelkad amu ag opodi bak doomnanu ag tolitak tutukuib mateg! Tolitak nau aib medapig. Ag ena atog noadnana, Nadi nuhig nai ipuanadnana, ib tutukupa omalateg!

BEGBEG DILAG NAI

⁵ Begbeg danab ag ahilkad gumak danab waalagpa dagom kobolpa daanna, ahilag udat pehetak heig! Ag oolag aditpa udat aib hepig. Ag Kristus ode dim lamidteb amubia ahilkad okai dilag ele anam heig!

⁶ Ag ahilkad okai amelagnuib, ag oolag itag aqakunuib aib hepig. Iita. Kristusnu udat danab, nug oo oh Kristus meta Kayak ode dim lamidte amubia heig!

⁷ Ag danabnu udat heteb amubia aib hepig. Iita, ag Kayaknu udat heteb amubia heig!

⁸ Adinu? Ag dooteb, aun nug udat ena hete amu nug Nadi topa nob ena anamib aoku. Nadi Nug begbeg udat danab dilagpa amu begbeg danab iita amu dilagpa ele anamib heku.

⁹ Gumak danab ag ele begbeg dilagpa anamib ena heig! Ag badaknu kobol ahilagpa aib hepig. Ag dooteb, Nadi, hab atan daate ele amu, Nug am begbeg dilag Nadi, ag gumak danab ahilag Nadi ele. Nug laa, nug danab onig okai ele, nuhignu ena doonna, laa onig iita ele nuhignu ehed dooteb amubia iinab hete.

BAG QAK NAI

¹⁰ Aria gog tak nai amu inam. Ag Nadi ele laipu daanna, nuhig gagatag okai ele aon, ag gagatag dayeg!

¹¹ Ban haknu bala oh, Kayak nug ag Satan edidkulagnu matom ele amu ag takeg!

¹² Adinu? Ig danab ele ban ii hetem. Iita. Ig oudi nau ag atan daateb amu wan imupan oudi nau ikilag amu ahilag okai amu ahilag daup ele ban hetem.

¹³ Amu ag kristen geha iiku Kayaknu ban bala tagapeg, dimpa ag ele ban hepeg, ban iita meeb amu ag hipaidna daaglag, Satan nug ag ii edadma.

¹⁴ Amge ag elele daaglagnu ag imu heig! Ag nai genab, amu matagid imualagpa tagateb amubia

takeg! Ag kobol tutuku aona, qahad palateb bia ag momolag hepeg nauhmananu paleg!

¹⁵ Ag madodnu Nai Ena hanhan baelag gada bia adapeg noad!

¹⁶ Ahilag gupid, amuam oopa genab doyak ahi-lag amu, ag amu hanhan Satannu lat dodo ab adu ele amu ii aqadmanu adaglag.

¹⁷ Kayaknu edua awikak amu ban danab ag ikilagpa aen hat meteb amubia aona amu Kayak nai, nuhig Oudi madate amu ahilag qep elab daakunu ele aon adeg!

¹⁸ Ag hanhan Kayak Oudipa Kayak Nug ag ehanadkunu unuqitak diigdiigpa atem atem Nug ag ehanadkunu unuqidkulag. Ag keeke amu dab menana ag aib niipig. Amu ele ag kristen danab laa oh dilag ele hanhan unuqidkulag.

¹⁹ Ag da ehanidkulagnu ele amu, ag Kayak Nug nai matiak haenpa da odelpa nai meeb, da madikulnu amu Nug heeb, dahil badak iita meeb, da gagatag awe, Kayaknu Nai Ena, tatam lokumak dayom amu, da madikulnu unuqiteg!

²⁰ Ao, da nai ena imu maditem amunu da mani guitakpa daatem. Ge, da amu madikulnu udat ele amunu amu ag Kayak unuqidpeg, Nug heeb, da badak iita ele nuhig nai oh tutukunab gagatag madikul.

²¹ Ag da atem daatem, da adi hetem ele amu, ag amu dooglagnu Tikikas, nug am da layal nab, nug Kayaknu udat danab genab, nug geha amu oh matieb dooglag.

²² Da nug ihinignu ab dooglagnu, ag gagatag aqakunu ele amununab aaku hei, ag gumata gote.

²³ Mame Kayak, Naḁi Jesus Kristus ele a maḁoḁ, oo mauhak amu oopa genab doyak ele kristen tamaniak danab ah oh madapeḁ daaglagnu ool daate.

²⁴ Amu Kayaknu ehanitak okai Nug hamu megte amu danab oh ag ihinig Naḁi Jesus Kristusnu oolag mauhaknab dooteb ele amu, ahilagpa dayad!

KAYAKNU NAI Tituanak Bau
The New Testament in the Nobonob Language of
Papua New Guinea
Nupela Testamen long tokples Nobonob long Niugini
copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 18 Mar 2025 from source files dated 31 Aug 2023

ed374bb9-d819-53d1-a85b-f86cce3892e1